

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 15 JULAI 2020 (RABU)

SOALAN

Minta **MENTERI PENGANGKUTAN** menyatakan langkah–langkah yang diambil oleh Kementerian sebagai persediaan kepada pembukaan sektor pengangkutan udara dan industri pelancongan mengikut SOP dalam fasa pemulihan COVID-19 di Malaysia agar ianya tidak dilihat merencatkan pemulihan industri pelancongan.

JAWAPAN

Yang Dipertua,

Untuk makluman Yang Berhormat, syarikat-syarikat penerbangan negara dan asing dibenarkan terus beroperasi sejak bermulanya pelaksanaan Perintah Kawalan Pergerakan (PKP) pada 18 Mac 2020 tertakluk kepada Prosedur Operasi Standard (SOP) tertentu memandangkan ianya adalah salah satu perkhidmatan perlu (*essential*).

Penularan wabak COVID-19 telah menjejaskan industri penerbangan negara. Statistik menunjukkan trend penurunan permintaan penumpang domestik dan antarabangsa mulai 1 Mac 2020. Jumlah permintaan penumpang berkurangan daripada 280,321 sehari pada bulan Januari 2020 kepada 7,500 sehari bagi bulan Mei 2020. Berdasarkan unjuran senario trafik penumpang Malaysia 2020, Suruhanjaya Penerbangan Malaysia (MAVCOM) menjangkakan jumlah tempat duduk perkhidmatan penerbangan penumpang akan berkurangan kepada 54.3 juta – 56.0 juta bersamaan -48.7% hingga -50.3% pada tahun 2020 (2019 – 109.2 juta penumpang).

Di samping itu, berdasarkan kepada cadangan International Civil Aviation Organisation (ICAO), World Health Organisation (WHO) dan International Air Transport Association (IATA), lebih banyak kelonggaran telah diberikan oleh pihak Kerajaan termasuk kebenaran untuk melakukan perjalanan rentas negeri dan pengecualian penjarakan sosial dalam pesawat bagi semua perkhidmatan penerbangan berjadual dan tidak berjadual.

Operasi penerbangan dilaksanakan tertakluk kepada SOP yang telah ditetapkan oleh Kementerian Kesihatan seperti berikut:

- (i) Saringan suhu badan diwajibkan kepada pekerja, pengguna, krew penerbangan dan penumpang;

NO. SOALAN : 51

- (ii) Pemakaian pelitup muka (*face mask*) diwajibkan di kawasan umum lapangan terbang serta kepada semua krew dan penumpang yang memasuki pesawat penerbangan;
- (iii) hidangan makanan dalam pesawat (*in-flight meal*) adalah tidak digalakkan dan interaksi dengan penumpang diminimakan;
- (iv) proses nyahkuman ruang pesawat selepas setiap operasi penerbangan; dan
- (v) amalan penjarakan sosial di kawasan umum lapangan terbang melalui tanda jarak 1 meter di lantai, meja dan kerusi kecuali di pintu pelepasan (*boarding gate*).

Selain itu, MOT, Kementerian Pelancongan, Seni dan Budaya (MOTAC) dan syarikat penerbangan terus bekerjasama bagi meningkatkan kesedaran dan keyakinan orang ramai untuk menggunakan perkhidmatan penerbangan bagi menggerakkan dan memulihkan sektor pelancongan domestik.

Bagi maksud menggerakkan sektor pelancongan antarabangsa, Kementerian Pengangkutan mengalu-alukan usaha Kerajaan dalam melaksanakan konsep *travel bubble* ke beberapa negara seperti Singapura, Brunei, Thailand, Vietnam, New Zealand, Australia, Korea Selatan dan Jepun. Melalui konsep tersebut, penerbangan dan penumpang dari mana-mana negara yang berada dalam kategori hijau akan dibenarkan memasuki Malaysia tertakluk kepada SOP tertentu seperti ujian saringan kesihatan yang ketat sebelum berlepas dan tiba di Malaysia perlu dipatuhi.

Dalam hubungan ini, cadangan *travel bubble* tersebut adalah tertakluk kepada rundingan yang sedang diadakan di antara Kementerian Kesihatan (MOH) dan Kementerian Luar Negeri dengan negara-negara terbabit.

Sekian, terima kasih.